

ARENDS AGENCIES TA CUMPLI SU 40 AÑA DI EXISTENCIA MAÑAN

ORANJESTAD (AAN) — ARENDS AGENCIES ta cumpliendo su 40 aña di existencia mañan dia 25 di Januari. Conversando cu su doño y director, Sr. Mario Francisco Arends el a conta DIARIO cu e empresa aki a worde stableci dia 25 di Januari 1956 na Wilhelminastraat 12A (pabao di Tivoli Club), pero for di mas of menos 20 aña pasa el a cuminsa muda poco poco te su establecimiento total na Santa Cruz, Hooiberg 92 caminda cu e ta ubica actualmente.

Sr. Arends a traha na LAGO exactamente 10 aña, esta, di aña 1936 pa 1946, durante segunda guerra mundial.

"Durante cu mi tabata trahando na LAGO mi a worde yama pa pasa servicio militar na Mariniers Kazerne, pero en bista di e importancia cu mi trabao tabata tin na LAGO unda mi tabata traha cu machinenan IBM, e hefenan a insisti pa un grupo di nos haya dispensacion loke nos a haya tambe".

Na aña 46 don Mario a contrae matrimonio cu Sra.

Sarita Oduber di cual matrimonio nan a haya 10 yiu, 5 muher, 5 homber.

"Despues di diez aña di trabao mi a laga LAGO pasobra semper mi a pensa di traha riba mi mes. Mi a lanta un tienda di comestible cu no a resulta.

E ora ey mi a bay over na e establece Arends Agencies, cuminzando desde "cero".

Mi a topa cu e suerte cu den tur e cartanan cu mi tabata manda na diferente pais di mundo pa haya contacto cu exportadoman, mi a topa cu un exportador grandi di New York cu tabata interesa y a brinda tur sorto di oferta pa supli tur e equiponan pa un supermercado, y esey a resulta hopi positivo pasobra den e temporada ey hopi negoshi tabata lantando na Aruba".

Tocante ki tipo di negoshi Sr. Arends a cuminsa cune, e kico el a bira den e transcurso di 40 aña di existencia, e ta relata:

"E tipo di negoshi cu mi a lanta e tempo aya tabata representante di fabrica y exportadoman, pues den un

palabra un AGENCIA.

Ta bon conoci cu den transcurso di añanan tur cos ta evoluciona, unda cu e tipo di negoshinan tambe ta cambia. Si antes nos tabata importado grandi di, entre otro, kerstboom, harina, camí na bari, etc., awendianos ta distribuidor di balansanan electronico, rekinan pa negoshi, shopping carts, y hopi otro sorto di equiponan pa supermercado. Un 95% di supermercadonan ta usa Digi-electronic Scales, di cual nos ta e "Official Factory Authorized Distributors", cu mas di 150 machine riba plaza. Nos ta mantene un departamento di servicio di benta cu ta back-up tur equipo cu nos ta vende.

Cartanan di gradicimento y "awards" ta prueba di nos bon trabaoonan pa cu nos clientenan principal".

DEPARTAMENTO DI EMBOTAYAMENTO

Arends Agencies tin su "Bottling Department" di cual don Mario Arends ta splica lo siguiente:

"Aki nos ta emboteya entre otro, nos afamado productonan di desinfectante, p.e: Pine-Oil, Creolina, Terpentina, Krisol, Amoniak, y hopi otro mas. Tambe nos ta produci e famoso vinagre puro "Arubanita", esencia Yolanda cu 14 diferente smak, agua destilada pa bateria y otro productonan varia".

Sr. Mario Arends ta sigui bisa cu e productonan aki ta worde bendi na practicamente tur tienda y supermercado na aruba y pa un tempo nan tabata embarca un volumen grandi di nan pa Bonaire.

GRADICIMENTO

Palabranan di gradicimento, Arends Agencies tin pa su supportnan:

"Pesey nos mester yama danki na tur doño di tienda, supermercado y restaurantnan pa nan colaboración y confianza deposita den nos. Danki ta bay na pueblo di Aruba en general cu semper

a back nos up door di prefera di usa nos productonan. Nan cooperacion tabata e motivo cu durante e curso di añanan nos por a crece y keda un di e firmanan Arubiano di gran renombre".

"Un danki special na Srta. Felicia Koolman kende hunto cu mi a mira Arends Agencies nace, pasa den tur su "ups and downs" y bira grandi".

Logicamente Srta. Koolman ta e man drechi di Sr. Arends y su trabao sigur a contribui enormemente na e exito di dicho empresa.

Sr. Arends ta manda palabranan di danki tambe

na tur otro empleado y part-time workers, y otro nan cu ta y a labora cu Arends Agencies. Sin e trahadoman aki nunca lo por a logra.

"Danki na mi señora y famia cu semper a duna un man desinteresadamente pa cu Arends Agencies".

Tambe danki na prensa escrito y radioemisoranan y tur cu di un manera of otro a duna nan support.

"Last but not least DANKI na Virgen di Alto Vista cu semper ta mi refugio y di unda semper mi a haya sosten, solucion, coraje y ayudo pa sali dilanti. Danki na tur!".

Pabien!!!



Cu boso 40 aña di existencia

Interprint

Pabien!!!



Cu boso 40 aña di existencia



Aruba

Pabien!!!



Cu boso 40 aña di existencia

